

Nisafaloco'an

O maolahay a somowal to caayay ko mamafilo tangasa kora patosokan sanay a tamdaw i, o mapidahay ko faloco' sa kako. O tamdaw hananay, ira ho ko patosokan no faloco' ano tahacowacowa karaay ko rarakaten awa ko katalawan nira. Saka o ciharatengay a tamdaw i ta ciepoc ko rakat i 'orip, o mitakopay to nisafaloco'an a tamdaw i, o mamakadofah ko kaciepoc no 'orip nira. Saka kafana' kita o widang no mako, o tadalipahakay ko milifetay misa'icelay to niharatengan, ano ira ko patosokan i faloco' no miso, ano masamaan i rakat ira ko kada'atan sa'icelen a milifet. Ora caay pakalaheci a tamdaw i, o awaay ko 'icel no faloco' tangsol sanay palasawad, o caayay pakafilo milaheci cingra to nisafaloco'an nira.

Itiya ho, ira ko cecay a kapah, tayra i lotokay a pitilidan malasingsi, o itiraay a finacadan awaay ko malokelonay talahekal miliyas to niyaro', nawhani saheto o pakoyoc ko 'orip, o itiniay a wawa caka pina a miheca ko pitilid caayay to pitilid, awaay ko mitiliday to Kocong, mangalef o Kawcong ato tata'akay pitilidan. Mafana' koya singsi cifaloco' to sapifalican tona matiniay a demak. Masahapinang to nira, caayay ko nika o pakoyoc aca, o tada kalimelaan i, o pakayniay i harateng no faloco'.

Yo ccay miheca, pakalayap to niasorotan a payso ko pitilidan nangra,

sa liyaliyaw sa palimo'ot ko citodongay, hakitinien sapisafangcal to pitilidan koni payso saan. Nikaorira maherek pakaala to payso koya kapah a singsi, caayay pidoedo to nisowalan, ala tona salong a payso hakelongen nira ko mamotep mitiliday tayra i Tokay misalama, caayay kaedeng ko payso foti' sa pikalican to cinamalay, 'alagad sa komaen to manto. Sarakat ho no wawa miliyas to paniyaro'an, paka'araw to samiyamiyat sanay a dawdaw, fafoliciliciw sanay ko cikay no paliding ato takarakaraway a loma', safaheka' sa a minengneng to i papotalay a hekal.

Patiko to minokay kona singsi, adihay to ko keter a sowal, mikitado to mitiliday talapapotal misalama sato. Nika i'ayaw ira to ko faloco' nira tona matiniay a keter, saka pasowal sa cingra. “Tada pakoyoc ko i lotokay a niyaro', ano sapifalican to pinangan nangra, edeng palokelonon ko mitiliday ho a wawa, pakafana'en cangra to i papotalay a hekal.” Orasak, mataelif to ko moetep a miheca, oya mikeridan noya kapah singsi a wawa maemin to matoor nangra ko nisafaloco'an nangra, ira to ko malakomoingay, malasingsiay ato malatawkiay a tamdaw.

夢想

有位年輕的老師到偏遠的小學任教，他發現不只是貧窮問題，更重要的是意識的問題。有年學校得到一筆捐款，拿到捐款後，他將全班十幾名學生帶到南方一個城市轉了一圈，錢不夠就睡車站，啃饅頭。孩子們第一次走出偏遠角落，看到閃爍的霓虹、不息的車流，拔地的高樓，親身感受世界的廣闊。

面對指責年輕的老師早有準備。他說：「山上的部落太窮，只有讓村民、讓孩子走出山上，才能知道山外的世界。」十幾年後，學生都學有成就。